



# Graduate Engineering & Technological Business School (GET-BS)

Faculty of Industrial Management

UNIVERSITI MALAYSIA PAHANG  
AL-SULTAN ABDULLAH

 JOIN NOW







[General](#)

## **UMPSA bakal tubuh Sekolah Pengajian Siswazah dalam Ekosistem TVET yang pertama di Malaysia**

20 December 2024

PEKAN, 20 Disember 2024 - Universiti Malaysia Pahang Al-Sultan Abdullah (UMPSA) akan mempunyai Sekolah Pengajian Siswazah dalam Ekosistem TVET pertama di Malaysia dengan penubuhan *Graduate Engineering & Technological Business School (GET-BS)* tidak lama lagi.

Institusi ini bakal menjadi Sekolah Pengajian Siswazah yang berteraskan pengurusan dan perniagaan dengan penekanan kepada elemen teknologi serta kejuruteraan.

Menurut Profesor Ts. Dr. Aida Mustapha yang menjalankan fungsi Naib Canselor UMPSA berkata, penubuhan GET-BS di bawah Fakulti Pengurusan Industri (FPI) ini mampu melahirkan pemimpin

---

perniagaan masa hadapan yang mampu memacu transformasi teknologi dengan inovasi tanpa mengabaikan matlamat kelestarian dan tanggungjawab sosial.

"GET-BS akan menawarkan program akademik, latihan, penyelidikan, dan konsultasi dengan menekankan elemen Sustainable Business Innovation serta TVET Termaju," ujarnya.

TVET Termaju dalam konteks GET-BS merangkumi kemahiran pengurusan dan keusahawanan untuk mengurus ekosistem teknologi tinggi, bukan sahaja teknologi, tetapi termasuk juga aspek sumber manusia, pemegang taruh dan komuniti.

Selain itu, kurikulum GET-BS akan diintegrasikan dengan prinsip *Environmental, Social, and Governance (ESG)* bagi memperkuat pengurusan ekosistem teknologi tinggi.

GET-BS juga akan menyediakan peluang kepada pelajar untuk berinteraksi secara langsung dengan penyelidik UMPSA, pihak industri, dan komuniti.

Pendekatan ini mampu mendorong pelajar menghasilkan projek inovasi dalam bentuk produk dan perkhidmatan, sekali gus mengukuhkan peranan mereka sebagai pencipta, pembangun dan inovator.



Menurut Profesor Ts. Dr. Aida lagi, penubuhan GET-BS juga akan disokong dengan 11 Kluster Kesepakaran UMPSA termasuk *Smart Campus, Sustainable Energy, Vehicular Technology, Material Science, Industrial Biotechnology, Fine and Specialty Chemical, Management and Social Science, Agriculture and Food Security, Rare Earth, Petrochemical* dan *Construction*.

---

“Dengan adanya GET-BS ini, ia akan menyokong UMPSA untuk terus mempergiatkan agenda dalam pembangunan kelestarian bagi menyokong Matlamat Pembangunan Lestari atau Sustainable Development Goals (SDG).

Sementara itu, Timbalan Naib Canselor (Akademik dan Antarabangsa), Profesor Dato' Ir. Ts. Dr. Ahmad Ziad Sulaiman berkata, hala tuju MTUN TVET Termaju 2030 menyediakan kerangka strategik yang kukuh untuk universiti teknikal seperti UMPSA dalam memacu pendidikan tinggi ke arah fleksibiliti, inovasi, dan integrasi teknologi.

“Sebagai MTUN, UMPSA komited untuk merealisasikan sasaran peningkatan enrolmen pelajar TVET seramai 150,000 menjelang tahun 2030 selaras dengan usaha memperluas akses kepada pendidikan yang relevan dengan keperluan industri global.

“Dengan inisiatif GET-BS yang berekosistemkan TVET dan inovasi perniagaan lestari akan menyokong kepada usaha pencapaian halatuju MTUN TVET termaju 2030 yang komprehensif, termasuk pelaksanaan inovasi pengajaran dan pembelajaran (PdP) seperti *micro-credentials, global classroom*, pembangunan kursus berdasarkan metaverse, penawaran program ODL di GET-BS.

“Pelaburan strategik ini tidak hanya bertujuan memenuhi permintaan industri semasa, tetapi juga untuk mempersiapkan graduan menghadapi cabaran dunia pekerjaan yang lebih kompleks,” katanya.

Tambah beliau lagi, dengan mengekalkan momentum inovasi dan dedikasi, UMPSA yakin mampu menjadikan Sekolah Perniagaan yang pertama di Malaysia berasaskan ekosistem TVET ini sebagai asas kecemerlangan akademik dan pembangunan modal insan negara, seiring aspirasi MTUN TVET Termaju 2030.

“Pihak universiti merakamkan penghargaan terima kasih atas kelulusan pihak Kementerian Pendidikan Tinggi (KPT) khususnya Jabatan Pendidikan Tinggi (JPT) yang menyokong usaha penubuhan GET-BS ini,” katanya.

**Disediakan Oleh: Mimi Rabita Abd Wahit, Pusat Komunikasi Korporat**

**TAGS / KEYWORDS**

[UMPSA bakal tubuh Sekolah Pengajian Siswazah dalam Ekosistem TVET](#)

- 201 views

[View PDF](#)

